

---

## Rapport annual 2019

---

Alla fin digl onn 2019 munta igl inventari dalla Biblioteca Trun 5372 medias, quei 2508 per carschi, 1484 per giuvenils e 1380 per affons. La biblioteca ei stada aviarta 173 dis. Duront quei temps han 1780 persunas visitau la biblioteca ed han empristau biabein 4500 medias.

Sco gia dapi entgins onns, ein nossas truccas da cudischs per ils bauns da leger postadas dil matg entochen igl october els loghens usitai; a Trun spel Rein ed a Carmanera, a Schlans-Davaruns, a Rabius-Igriu ed a Cumpadials silla piazza da giugs.

La mesjamna, ils 22 da matg, ha igl institut Svizzer da medias per affons e giuvenils SIKJM iniziàu per la secunda gada in di da preleger. David Flepp, il promotur regional dalla Lia Rumantscha, ha raquintau cun grond anim dallas aventuras dalla famiglia Babulin, tier la quala igl ei propi mai lungurus. Ils affons san s'identificar cun ella, cun siu lungatg e cun siu mintgadi. Ils numerus affons ed era lur mummas han gudiu in suentermiezdi divertent cun eglis tarlischonts e buccas rientas.

Ensemen cun CURVITA l'uniun per confamigliars che tgiran, Pro Senectute Surselva ed Alzheimer GR havein organisau ina sera da referats. Mesjamna, ils 30 d'october pil di dils confamigliars che tgiran, han Cornelia Kazis, autura e schurnalista, e Curdin Casaulta, dipl. luvrer social dalla Pro Senectute Surselva, dau inputs, tips e rispostas allas damondas dil vast publicum.

Venderdis, ils 8 da november allas 20.00 uras ha igl autur surmiran Benedetto Vigne prelegiu ord siu cudisch «Ils ventganov da settember». Era ha el, ensemen cun Gion Fry, presentau la versiun romontscha dil renomau comic franzos «L'aimant» da Lucas Harari, che porta il tetel «La Calamita». Sco duo musical Benni & Gioni han els cantau e sunau pliras canzuns ord atgna plema, sco era enqual sempverd internaziunal translatau per romontsch.

Mintga otg jamnas, mintgamai il venderdis suentermiezdi, envidein nus nos visitaders pigns cun lur mummas, babs, tattas ni tats a tedlar ina historia che Pauli, il lieuret, raquenta. Quella purschida sedrezza ad affons da 3 – 6 onns che teidlan bugen historias.

Duront gl'entir onn da scola visetan era las classas regularmein la biblioteca. Ils scolars han la pusseivladad da visitar il portal online «Antolin» nua ch'els san rispunder a damondas sur dil cudisch gest legiu. Quei en fuorma da giug ed aschia animescha quei enqualin da leger.

Per la Biblioteca Trun: *Olivia Pfister-Tgetgel, caubibliotecara*